

Pagkabalaan

Hebreohanon 10:10, "Ug pinaagi sa maong kabubut-on kita nangahinlo gikan sa sala pinaagi sa makausa ra ug dayon nga paghalad sa lawas ni Jesu-Cristo."

San. Juan 17:17-19, "Balaana sila pinaagi sa kamatuoran; ang imong pulong mao ang kamatuoran. Maingon nga gipadala mo ako sa kalibutan, maingon man usab gipadala ko sila sa kalibutan. Ug tungod kanila nagdidikar ako sa akong kaugalingon aron sila usab tinuod nga madidikar."

Unsa kini? Oh, ang Dios nagkinahanlan ug paghingpit. Siya nagkinahanglan sa imong paghinulsol. Nagkinahanglan Siya sa imong pagkamaunongon ngadto Kaniya. Apan Siya nagapangita karong panahona. Bisan unsa ikaw ka makasasala, bisan unsa ka gamay kon unsa ka daku, ikaw sa gihapon usa ka makasasala, ug dili makasulod sa laing agianan gawas pinaagi kang Jesu-Cristo, ang igo sa tanan nga Halad sa Dios. Ug diha Kaniya ikaw nahingpit sa walay katapusan. Hunahunaa kini!

Kini dili imong kahimoan. Kini dili sa imong pagpakli sa bag-ong mga pahina. Dili kini usa ka bag-ong kinabuhi nga imong gisugdan. **Mao kini ang pagsugid sa imong sayup, ug grasya sa Dios kanimo. Mao kana ang nagdala kanimo ngadto sa pagkahingpit, ug unya ikaw nahingpit diha kang Jesu-Cristo.**

Ikaw moingon, "Igsoong Branham, kanus-a ako makaundang sa pagtabako, kanus-a ako makaundang sa pag-inom, kanus-a nako matul-id kining butang, kay buhaton ko kini." Oh, dili gayud kini mahimo. Dili ka gayud makabuhat niini. Nganong dili ka lamang moduol sa paagi kung unsa ka man? **Ug, pinaagi sa pagtoo, moadto ka nianang Dagayday,** ang Imong nagadagayday nga mga samad mao ang nagasangkap, unya ang matubsanong gugma mao ang imong hilisgutan, ug mao kana hangtud ikaw mamatay.

Nganong mokuha ug panghalili? Ngano nga mosulay sa pagsulod pinaagi sa imong simbahan? Nganong mosulay sa pagsulod tungod kay ikaw

miundang sa pag-inom kon miundang sa pagbakak? Mosulod pinaagi sa dalan sa pagkahingpit. *“Kay pinaagi sa usa lamang ka paghalad iyang gihingpit alang sa tanang kapanahonan sila nga mga gipangbalaan.”* (Heb. 10:14).

“Unsaon nako nga mahimong balaan?” Isugid ang imong mga sala diha sa Presensya sa Dugo ni Jesus; ug ang Kinabuhi nga gikan nianang Dugo, mobalik ngadto sa nagasimba ug magabalaan kaniya gikan sa mga tinguha sa mga butang sa kalibutan. **Kay pinaagi nianang igo sa tanan nga Halad Siya nagbalaan kanato; usa ka Espiritu, kitang tanan nabautismohan ngadto sa usa ka Lawas** (1 Cor. 12:13). *“Busa karon walay pagkahinukman sa silot niadtong mga anaa kang Cristo Jesus, nga nagakinabuhi sa dili uyon sa unod, kondili uyon sa Espiritu”* (Rom. 8:1). Kung ikaw naningkamot sa paglakaw pinaagi sa Espiritu, ug sa gihapon nagapangibog diha sa unod, ang Halad wala sa igo napadapat ngadto kanimo. Apan ang nagasimba nga sa makausa nahinloan wala nay tinguha sa pagpakasala (Heb. 10:2).

Mao kana ang Kalbaryo. Dili mao kana ang dapit nga baligyaanan ug mga bulak, kon usa ka gamayng dapit sa pagbuhat niini kon niana. Usa kini ka dapit diin ang Dios ug ang tawo napasig-uli. Mao kana ang dapit diin ang pakigdait ug hingpit nga kahilwasan gidala ngadto sa katawhan. Mahimo ba nga mouban ka kanako karong gabhiona, akong higalang makasasala, ngadto sa Kalbaryo, ug pinaagi sa pagtoo ibutang kining Dugo nganha sa imong kalag, ug **tugoti ang Espiritu Santo moanha ug magabalaan kanimo pinaagi sa Iyang dakung Halad?** (II Tes. 2:13).

Kung adunay bisan unsang butang nga akong mahimong mabuhat sa paghimo sa akong kaugalingon nga hingpit diha sa Presensya sa Dios, nan si Cristo dili kinahanglan mamatay alang kanako. Kung adunay usa ka butang nga imong mahimong mabuhat nga takos sa bisan unsang butang diha sa Presensya sa Dios, nan si Crist namatay nga walay pulos. Walay pagbantay sa kasugoan, walay imong mabalaodnon nga mga ideya, wala sa imong kaugalingong pagkabalaan, **walay mga butang nga imong mahimong undangon sa pagbuhat:** pag-undang sa pagpamakak, pag-undang sa pagpangawat, pag-undang sa pagsigarilyo, pag-undang sa pag-adto sa mga sinehan, sa gihapon ikaw nawala. Walay bisan unsang butang nga makabuhat niini. Magpasakop sa mga simbahan, mga ritwal, mga seremonyas, mga pagbautismo, mga lagda sa mga simbahan, pagbasa ug mga kredo, paglitok ug mga pag-ampo, kanang tanang mga butang dili pagaisipon. Ikaw nawala. Walay usa ka butang nga imong mahimong buhaton diha sa imong kaugalingon, kay ikaw usa ka makasasala ilalum sa paghukom. Ug walay paagi diha sa imong kaugalingon, kon bisan unsang kredo, kon bisan unsang

butang nga imong mahimong buhaton, kon maghunahuna sa imong kaugalingon, nga mahimong takus ug usa ka butang diha sa Presensya sa Dios, tungod kay ikaw makasasala gikan sa pagsugod. [1]

Dili ka makahimo, bisan unsay imong buhaton, moundang sa pag-inom, moundang sa pagsigarilyo, moundang sa pagpamakak, moadto sa simbahan ug maningkamot sa pagbuhat niini ug maningkamot sa pagbuhat niana, sa gihapon ikaw kalibutanon. Mao lamang kana ang kasugoan; ang kasugoan dili makahingpit. Apan unsa ang makahingpit? Si Cristo. Himaya. Tingali makahimo ako nga moundang sa pagpamakak, moundang sa pagpangawat, moundang sa paghimog pagpanapaw, moundang sa pagmama, ug moundang sa tanan nakong mga butang, ug sa gihapon ako kalibutanon. Ang Dios dili modawat niini, tungod kay wala akoy halad nga pagpasig-uli nga ihalad ngadto Kaniya.

Apan sa dihang akong itapion ang akong mga kamot sa bulahang ulo sa Ginoong Jesus, ug moingon, “Ginoo, walay maayo kanako; mahimo ba nga Imo akong dawaton ingon nga Imong ulipon?” ug ang Dios magakuha sa akong sala, magabarug ako nga hingpit sa panan-aw sa Dios. Tinuod kana. Ngano? Wala ako mobarug pinasikad sa akong katakus, ako nagabarug sa Iyang katakus, **ug Siya naghingpit kanato pinaagi sa Iyang pag-antus ug sa Iyang Dugo (Heb. 10:14).** [2]

"Kay pinaagi sa usa ka halad gihingpit Niya... (Hangtud sa sunod rebaybal? Unsay akong gisulti?)... Siya naghingpit sa dayon kanila nga sa gihapon Iyang gibalaan" (Heb. 6:1-2). "Magapadayon kita ngadto sa kahingpitan."

Karon, kamong katawhan nga mga holiness moingon “Oh oo, kami nagatoo sa pagkabalaan. Hallelujah, kami nagatoo sa pagkabalaan.” **Apan kamo nagabuhat sa inyong kinaugalingon. Kamo mihunong lamang niini ug mihunong niana; nahibalo kamo nga dili ninyo angayng buhaton kini. Gawas kung si Cristo ang miabli sa pultahan, ug nagahatag ug kinabuhi niini ngadto sa imong kasingkasing, ug ikaw nahimong usa ka dapit kung diin ang sala patay na, ug ang tinguha, kining tanan wala na... (Heb. 10:1-2).** Unya Siya magakuha sa imong kinaugalinong pagkamatarung (*Rom. 10:1-4*), **Siya sa ingon niana magapahimutang sa Iyang kaugalingon diha kanimo Col. 2:6-7.** Ug mao kana si Cristo, ang Anak sa Dios diha kanimo, ang paglaum sa himaya (*Col. 1:26-27*). [3]

Wala ikaw nakabig hangtud nga imong nadawat ang Espiritu Santo (*Lucas 22:31-32*). Tinuod kana. Ikaw nagatoo ngadto... Ang Espiritu Santo nagapamulong ngadto kanimo, ug atubangan sa katawhan ikaw nagasugid Kaniya. Ang yawa nagabuhat usab sa ingon nga butang. “Ako nagatoo Kaniya ingon nga Anak sa Dios.” Mao usab ang yawa. Apan ikaw ngalakaw padulong ngadto Kaniya. **Sa dihang si Pedro gitawag ug gipakamatarung pinaagi sa pagtoo sa Ginoong Jesu-Cristo...** Ug sa Juan 17:17, **si Jesus nagbalaan kanila pinaagi sa Pulong**, kay ang Pulong mao ang Kamatuoran, ug Siya mao ang Pulong. “*Sa sinugdan mao na ang Pulong, ug ang Pulong uban sa Dios ug ang Pulong Dios. Ug ang Pulong nahimong unod, ug mipuyo ipon kanato*” (*San Juan 1:1-3, 14*) .

Siya mao ang Pulong, busa Siya nagbalaan kanila. Siya miingon, **“Amahan (namulong ngadto sa Espiritu sa sulod Kaniya), Ako nagabalaan kanila pinaagi sa Pulong.”** Sa Iyang kaugalingon nagatapion sa Iyang mga kamot ibabaw kanila. “Ang Imong Pulong mao ang Kamatuoran.” Nagapamulong gayud Kaniya ngadto sa pagkaanaa diha sa tagoangkan sa usa ka babaye. Oh, sa hingpit imposible alang Kaniya nga mahimong laing paagi kay sa niining Pulong sa Dios nga magapadayag Kaniya. “Ako nagabalaan Kanila.” [4]

Karon adunay **tulo sa pagkahingpit sa mga hugna sa grasya ngadto sa iglesia: pagkamatarung, pagkabalaan, bautismo sa Espiritu Santo.** Mao kana ang naglangkob sa bag-ong pagkatawo. Sama lamang sa natural nga pagkatawo ginatipo kini. Nga diin ang usa ka babaye nagapanganak ug usa ka bata, ang unang butang nga mogula mao ang tubig, dugo, unya ang kinabuhi. Ang Biblia miingon sa I Juan 5:7-8, “***Adunay tulo nga nagapamatuod didto sa langit, ang Amahan, ang Pulong (nga mao ang Anak), ug ang Espiritu Santo; kining tulo usa. Adunay tulo nga nagapamatuod dinhi sa yuta: ang tubig, dugo, ug ang espiritu-tubig, dugo, ug ang espiritu; kining tulo nagkauyon sa usa .***”

Karon, ang Amahan, Anak, ug ang Espiritu Santo Usa. Dili nimo mabatonan ang Amahan nga walay Anak, dili nimo mabatonan ang Anak nga walay Espiritu Santo. **Apan dili ka mamatarung nga dili mabalaan. Dili ka mabalaan nga dili mahimong mapuno sa Espiritu Santo.** Kon makabaton ug tubig nga walay Dugo, ug ang Dugo nga walay Espiritu. Atong mapamatud-an kana diha sa kahimtang sa kinaiyahan. [5]

Ug mao usab kini diha sa espirituhanon nga kahimtang. Mao kana ang tubig: pagkamatarung pinaagi sa pagtoo, pagtoo sa Dios, pagdawat

Kaniya ingon nga imong personal nga Manluluwas, ug nabautismohan (Juan 1:12-13; Mga Buhat 2:37-41); ikaduha pagkabalaan sa Espiritu, nga ang Dios nagahinlo sa espiritu gikan sa tanang mga butang sa kalibutan ug ang tinguha sa kalibutan; ug unya ang Espiritu Santo moabut ug magahatag ug bag-ong pagkatawo ug mopuno nianang gibalaan nga sudlanan. [6]

Sa laing pagkapulong, ang tawo nga nakalatas sa pagkamatarung; siya molakaw, moingon “Ako nagatoo nga buot ko mowali sa Pulong.” Siya naluwas; siya moingon, “Gikapoy na ako sa pagpakasala.” Karon. Siya mogula, ug nahauna siya sa gihapon nagasigarilyo, ug tingali nagapangibog ug uban pang butang. Taudtaud siya moingon, “Dios, dili kini angay sa usa ka Cristohanon, ilabina sa usa ka ministro, sa pagtan-aw sa usa ka babaye sa sayup nga paagi, sa pagsigarilyo,” kon; “Ako naga-inom ug beer panagsa kauban sa mga tawo, ug bisan ang akong kongregasyon, apan murag dili kini husto. Balaana ako, Ginoo.” Ug **unya ang Ginoo magabalaan kaniya, magakuha sa tanang pangibog pahilayo kaniya, tanang butang. Unya siya usa ka nabalaan nga sudlanan.** Unya ang itanyag sa Dios ngadto kaniya mao ang mabautismo sa Espiritu Santo. Sa pagbuhat niana, kinahanglan siya mogula nianang pundok nga iyang gikauban (*II Cor. 6:14-18*). Diha niana kung diin makita ang iyang bulok; unya siya mosibog. Unsay iyang mabuhat sa dihang siya mosibog? **Iyang giyatakan ang Dugo ni Jesu-Cristo nga nagbalaan kaniya, ingon nga kini usa mahugaw nga butang, dili makahimo sa pagdala kaniya ngadto didto.** Unya imposible kini alang kaniya nga maluwas. Ug unya unsa man ang dangatan niana? Apan ngadto sa kabangis sa kalayo ug sa paghukom (*Heb. 10:26-29*). [7]

Matikdi unsa ka matahum kini dinhi. Atong nahisgutan kini sa miaging adlaw. Tan-awa dinhi, dinhi, “Busa sa ginapakamatarung, ginapakamatarung pinaagi sa pagtoo...” (*Rom. 5:12*). Karon, ikaduhang dapit, **human nga nahugasan** (Efeso. 5:25-27), **nabalaan, ug unya napuno sa Espiritu Santo.** Pagkamatarung, pagkabalaan, bautismo sa Espiritu Santo. Nakita ninyo? Unsa ang iyang mensahe? Pagkamatarung pinaagi sa iyang pagpatalinghug; **pagkabalaan mao ang unsay imong buhaton;** mahitungod sa unsay imong gibuhay sa pagpasalamat niana, **ang Dios magatimri kanimo pinaagi sa Espiritu Santo** (*Efeso 1:13-14*). [8]

Mao kana ang paagi sa pagkuha kanimo, pinaagi sa pagkamatarung, pagkabalaan, **ug mamatay aron modawat sa Kinabuhi** (Amen.), dili ngadto

sa usa ka denominasyon kon ubang kredo, **apan ngadto sa kamatayon sa imong espiritu, aron ikaw mahimong matawo pag-usab** (*Juan 12:23-25*).

[9]

Mao kini kung unsa ang gitudlo niini kanato: **nga ang Dios makahimo sa paggamit sa matag bahin sa atong pagkatawo kung kini itugyan ngadto Kaniya**. Mahimong gamiton Niya ang atong hunahuna, ang atong mga damgo, ang atong ubos sa tanlag, ang atong unang konsensya, ang atong dila, ang atong mga awit, ang atong mga mata, ang atong... **Tanang butang nga atong nabatongan mahimong magamit sa Dios kung kini itugyan ngadto sa Dios**. Nakita ninyo? Tanang butang nga mao ikaw itugyan kini ngadto sa Dios. Iyang gamiton ang matag agianan ug matag bahin kanimo, Iyang gamiton kini. Bisan kung unsa man kini, **Iyang gamiton kini kung kini nabalaan ngadto sa Iyang katuyoan ug pagtawag**. [10]

Ikaw gibautismohan ngadto sa paghinulsol, kon usab, alang sa pagpasaylo sa imong mga sala (*Mga Buhat 2:38*). **Ikaw nagsugid sa imong mga sala atubangan sa Dios, ug Siya mipasaylo kanimo tungod niini**. Ug ikaw gibautismohan aron ipakita nga ikaw gipasaylo, nagsugid ngadto sa katawhan ug nagpakita ngadto sa kalibutan nga ikaw mitoo nga si Jesu-Cristo namatay alang kanimo, ug Siya mikuha sa imong dapit, ug karon ikaw mibarog diha sa Iyang dapit. Siya nahimong ikaw aron nga ikaw mahimong Siya. **Tungod niana ang makabalaang gahum sa Dios nagahinlo tanang mga bisyo gikan sa imong kinabuhi**. Kanhi ikaw nagasigarilyo, naga-inom, nagabuhat ug mga butang nga dili maayo, nagasultig bakak, tanang butang. **Unya ang makabalaang gahum sa dugo ni Jesu-Cristo miabut sa imong kinabuhi; mikuha kini sa tanang butang pahilayo gikan kanimo** (*Rom. 15:16*). Ug sa dihang ikaw makasulti, usa ka butang nga sayup, dihadhiha ikaw moingon, “Kadiyot lang; pasayloa ako, dili ko buot nga isulti nga sama niana.” Nakita ninyo? Ang yawa adunay gibutang nga lit-ag dinha, **apan ikaw nakabaton ug grasya nga mobalik kung ikaw usa ka tinuod nga Cristohanon**, moingon, “Ako nasayup.” Oo.

Karon, ang sunod nga butang imong madawat ang bautismo sa **Espiritu Santo ug Kalayo** (*I Cor. 12:13; Mateo 3:11-12*). [11]

Mao kini ang akong mensahe ngadto sa iglesia karon. Kamo nagabarog, kung kamo nagabarog diha sa Pulong sa Dios ug uban sa Pulong sa Dios, matag amen, matag tulbok, matag titulo. Asa kamo nagabarog? Sultihan ko

kamo: pahilayo kamo gikan kanila nga mga uhot ug **sumolod kamo sa trigo diin kamo mahinog atubangan sa adlaw**. Akong nadunggan ang pag-abut sa nagkahiusa. **Kamo nagabarog nga hingpit, gipakamatarung sama nga wala gayud ninyo nabuhat kini sa unang dapit. Hallelujah.** Ako dugang mapasalamaton alang niana kaysa bisan unsang butang nga akong nahibaloan. **Kamo mao ang putli, may katakus, walay sala nga Pangasaw-onon sa Anak sa buhi nga Dios. Matag lalake ug babaye nga natawo sa Espiritu sa Dios, ug nahinloan sa Dugo ni Jesu-Cristo, ug mitoo sa matag Pulong sa Dios, nagabarog nga sama nga kamo wala gayud nakasala sa unang dapit. Kamo hingpit. Ang Dugo ni Jesu-Cristo...** [12]

Sa dihang ang usa ka tawo modawat kang Cristo ingon nga iyang Manluluwas, ang tanang butang anaa sa kahusay. Tanang butang, ang mga langgam nanag-awit nga lahi, ug ang tanan matam-ison. Ug, oh, tan-awa, ang tanang butang maayo gayud sa dihang ikaw unang naluwas. **Unya miabut ang panahon sa pagsulay, ang pagbadlong, panahon sa paghinlo, pagahinloan ang imong kaugalingon gikan sa mga butang sa kalibutan,** “Pagsalikway sa tanang kabug-at nga nagapiit sa paglikos kanimo” (*Heb. 12:1-2*). Ikaw, nga usa ka tawo, kinahanglan moundang sa imong pagsigarilyo, moundang sa imong pag-inom, moundang sa imong pag-adto sa bilyaran, tanan nimong panggabii nga mga salosalò. Kanang tanang mga butang, kinahanglan imong pagabalaanon ang imong kaugalingon gikan kanila pinaagi sa pagtoo diha sa Dugo ni Jesu-Cristo (*Mga Buhat 26:18*): **pagbalaan sa imong kaugalingon.** Kamong mga babaye kinahanglan magpataas sa inyong mga buhok, patas-a ang inyong mga bistida, ug paglihok nga lahi kaysa inyong naandan, **panahon sa pagbalaan.** Sa daghang mga panahon sila nagrebelde ug mibalik; buyno, kana dili anak sa Dios. Nakita ninyo? Ang anak sa Dios mototok deretso sa Kalbaryo ug nahibalo nga alang kini sa iyang kaayohan.

Sa dili pa kining tawhana makaabut ngadto sa bautismo sa Espirirtu Santo, kining tawhana, siya kinahanglan sa nahauna adunay **pagkabalaan nga proseso.** Siya kinahanglan adunay **usa ka panahon sa pagsulay sa iyang kinabuhi.** Tanan kaninyo kinahanglan anaa niini. Siya kinahanglan adunay panahon sa pagsulay. “Matag anak nga moduol sa Dios, nahauna latigohon, kastigohon, bunalan. Ug kung kita dili makasugakod sa pagpanton, sa nahibalo nga “**ang tanang butang alang sa kaayohan ngadto kanila nga nahigugma sa Dios**” (*Rom. 8:28*), **tungod niana kita mga mga anak nga lalake ug mga anak nga babaye sa Dios;** unya Siya magaselyo kanato sa Espiritu Santo hangtud sa adlaw sa atong katubsanan (*Efeso 4:30*). Nakita

ninyo, mao kana ang pagpanton, ang kasakitan, ang butang nga atong pagaagian. [13]

Tungod niana, walay laing dugo nga makapabalaan sa tawo (*Heb. 13:12*). Ako dili makapabalaan kanimo, ug ikaw dili makapabalaan kanako, tungod kay kitang tanan natawo pinaagi sa sekso. Apan si Jesus natawo nga dili pinaagi sa sekso. Tinuod kana. **Busa ang iyang Dugo mao ang Makapabalaan. Ug ang Dios mikanaug, naghimo ug usa ka lawas, mipuyo sa sulod niini, mipaula nianang Dugo alang sa pagbalaan niini** (*Pin. 1:5*), **nga sa hingpit nagpalagpot sa sala ug kaulawan** (*Heb. 10:5-14*).

[4]

Karon, **ang unang lakang mao ang paghinulsol ngadto sa Dios, ug unya mosunod human niana, mao ang bautismo sa tubig.** Bautismo sa tubig: “Paghinulsol ug magpabautismo sa ngalan ni Jesu-Cristo” (*Mga Buhat 3:37-41*). Nakita ninyo? **Mosunod ang bautismo sa tubig, nagpakita nga ang paghinulsol tinuod, kon, sa pagpasaylo sa nangaging mga sala.** Karon, **kana walay kalabutan sa umalabot nga sala** (*Gal. 6:1; I Juan 1:8-10; I Juan 2:1-2*). Mopasaylo lamang kini. “Paghinulsol ug magpabautismo sa Ngalan ni Jesu-Cristo.” Alang sa unsa? **Pagpasaylo, sa pagkuha sa nabuhat na nga sala:** walay kalabutan mahitungod wala pa nabuhat. Nagtangtang lamang sa imong sala, sa unsay nabuhat na nimo.

Dili ka makahinulsol sa unsay nabuhat ni Adam. Wala nimo gayud kini buhata; si Adam ang nagbuhat niini. Makabaton lamang ikaw sa kapasayloanan sa unsay imong nabuhat. **Ang daang kinaiya anaa pa gihapon dinha.**

Mao kini ang kasingkasing sa tawo, ug kini mao ang kasingkasing sa tawo. Karon, kining usa dinhi adunay **bitin sa sulod niini; mao kana ang sala.** Kini dinhi siya adunay kinabuhi. **Kining usa sa ibabaw dinhi adunay Salampati sa sulod niini, nga mao ang Espiritu Santo** (*Mateo 3:16-17*). Dinhi siya adunay kinabuhi. Buyno kining usa dinhi siya adunay pagkadautan, pagdumot, kasina. Buyno, kining usa sa ibabaw dinhi adunay gugma, kalipay, ug pagkamainantuson, ug mao kana ang nabuhat niini sa ubos dinhi.

Karon, sa dihang ikaw gipasaylo sa imong mga sala, imo lamang gibuhat kini, gikuha kana. **Apan ang butang nga nakapahimo kanimo sa pagbuhat niini anaa pa gihapon dinha. Mao kana ang karaang gamut sa dautan. Anaa pa gihapon dinha.**

Matikdi, **unya ikaduha moabut ang pagkabalaan, nga magapahimutang sa atong hunahuna alang sa pagkabalaan: sa paghunahuna ug maayo. “Pagkabalaan” mao ang duha ka mga pulong sa Greyego nga nagkahulogan “nahinloan ug gilain alang sa bulohaton” (Prob. 23:7; Salmo 51:10-12).**

Karon matikdi, ang pagkabalaan, ang ikaduhang hugna niini, nagahinlo sa salabutan, nagpahimutang sa kasingkasing, **ang salabutan sa kasingkasing alang sa pagkabalaan.**

Ang usa ka tawo makahimo sa paghinulsol ug siya sa gihapon nagahunahuna sa... Buyno, tingali siya usa ka dautang tawo. Matag dautang tan-awon nga babaye iyang pangitaon; sa gihapon anaa pa kana dinha. Tingali siya usa palahubog. Matag panahon siya makasimhot ug ilimnon; sa gihapon anaa kini dinha. Nakita ninyo? **Apan sa dihang nabalaan siya, kana nagahinlo nianang tinguha gikan kaniya. Nakita ninyo? Kini nagakuha sa pangandoy niini (Heb. 10:1-2). Sa gihapon siya mahimong matintal, apan Siya nagkuha sa panagandoy gikan niini.** Sa gihapon siya dili pa maayo. **Unya siya nabautismohan sa Espiritu Santo ug kalayo (Mateo 3:11). Nahinloan, gisunog, gilimpyohan, ug unya gitagana alang sa bulohaton.**

Ang bautismo sa Kalayo ug Espiritu Santo aron ang Dios makapuyo sa sulod kanato, **ug ang kalayo sa Dios magahinlo sa atong mga kasingkasing gikan sa sala ug magbutang sa Espiritu Santo sa sulod (Mga Buhat 2:1-4; 4:31).** Unya kita makapalugwa sa mao ra nga Kinabuhi nga gibuhat niini, tungod kay anaa kana sa sulod kanato. [14]

Hunahunaa, ang inyong mga bisti gilabhan pinaagi sa Tubig sa nagkadugo nga Pulong (Efeso. 5:25-27). **Ang Pulong nahimong Dugo, ug kamo gihugasan sa nagkadugo nga Pulong (Juan 1:1-3,14). Ang Pulong nagkadugo, ang Kinabuhi sa Dios anaa diha sa Pulong, ug ang Pulong nagkadugo alang kanimo,** aron ikaw mahimong mahugasan gikan sa kahugaw niining **mga bigaon ug mahimong mahinloan ug mabalaan pinaagi sa paghugas sa Tubig sa Pulong** nga makahimo sa imong salabutan ug kasingkasing nga magpabilin sa Dios ug sa Iyang Pulong. [12]

Ang profeta sa Dios sa atong panahon namulong diha sa pag-ampo:

Ginoo, diha sa Kahayag sa Imong Pulong, ako nagamando sa matag tawo nga wala pa mabautismohi sa Ngalan ni Jesu-Cristo sa madali moadto ngadto sa tubig dayon samtang kamo anaa pay higayon. **Kamo nga wala pa mapuno sa Espiritu Santo, ako nagamando kaninyo sa Ngalan sa**

Ginoong Jesu-Cristo; moluhod ug dili motindog hangtud ang Espiritu Santo magabalaan kaninyo sa hingpit (*I Tes. 5:23-24*) ug magpuno kaninyo sa Iyang gugma ug pagkamaayo hangtud ang inyong kalag matagbaw diha sa presensya sa Dios aron ang inyong katibok-an nga pangandoy mao ang pag-alagad kaniya ug magalakaw alang Kaniya sa tibook ninyong kinabuhi. Tugoti kini, ako nagaampo, nga ang Dios magahatag kaninyo niining butanga, sa Ngalan ni Jesu-Cristo (*II Cor. 7:1*).

[15]

Among langitnong Amahan, kami nagaduko diha sa Imong Presensya alang niadtong anaa sa altar. Tugoti ang Imong grasya magapahiluna sa matag usa kanila, Amahan. Dili ako makahimo alang kanila. Kinahanglan sila magabuhat niini sa ilang kaugalingon. Walay tawo nga makahimo sa pagbuhat niini alang kanila. Sila lamang ang kinahanglan makabuhat niini. Tugoti ang ilang mga kalag karon moingon sa ilang kaugalingon “Oh Dios, kining pagkamainiton sa ulo, akong ibutang kini dinhi Ginoo; dili na gayud nako kini kuhaon. Bisan unsa man ang moabot kon moadto, **akong isalikway kini gikan karon.** Kining akong dila madali lang modapig sa mga pundok sa mga tabian, Ginoo, akong ibutang kini dinhi. Dili na gayud balikan ko kini. **Balaana ang akong dila, Ginoo. Tugoti nga mabati ko ang mga Manulonda nga moabut sama sa gihimo ni Isaias sa dihang siya miingon, ‘Ako adunay mahugaw nga mga ngabil. Alaut ako.’** Ug ang Manulonda miabut, mikuha sa kumpit, ug miadto sa halaran, ug mikuha sa mga baga, ug gibutang sa iyang mga ngabil, ug nagbalaan niini.” Dios, balaana ang matag nagasulti nga nagasulti ug dautan ug nagsabwag ug pakigbingkil. Tugoti kini, Ginoo. [16]

Sa makita nga ang mga kalayo sa rebaybal nagsugod sa pagkapalong, tugoti kami nga mobutang ug kahoy sa Pulong, nga kini mopasiga ug bag-ong kalayo, nga ang among mga kasingkasing mapuno sa kadasig. **Balaana kami, pinaagi sa Imong bililhong Pulong, ug sa Imong Dugo, ug sa Imong grasya kami nagapangamuyo;** ug ang tanang pagpasalamat ug pagdayeg alang lamang Kanim. Kuhaa ang tanang pagpihig gikan sa among mga kasingkasing; hinloi kami, oh Ginoo! Hatagi kami ug putli nga mga kasingkasing, ug mahinlo nga mga kamot, ug mahinlo nga mga salabutan, aron kami mahimong makaduol ngadto sa Imong balaang dapit, managsadya ug mapuno sa Imong Espiritu. Among gipangayo kini sa Ngalan ni Jesus ug tungod lamang Kaniya. Amen. [17]

Reperensya:

- [1] "The Perfection" (57-0419), par. 77-83, 30
- [2] "Hebrews Chapter 7 Part 2" (57-0922), par. 366
- [3] "Hebrews Chapter 5 & 6" (57-0908M), par. 128
- [4] "What The Holy Ghost Was Given For" (59-1217), par. 54, 85
- [5] "The Seed Is Not Heir With The Shuck" (65-0218), par. 49-50
- [6] "Birth Pains" (65-0124), par. 49
- [7] "Questions & Answers" (61-1015M), par. 79
- [8] "Revelation Chapter 4 Part 3, Throne of Mercy" (61-0108), par. 211
- [9] "Letting Off The Pressure" (62-0513E), par. 124
- [10] "God's Gifts Always Find Their Place" (63-1222), par. 41
- [11] "Things That Are To Be" (65-1205), par. 63-64
- [12] "Invisible Union Of The Bride Of Christ" (65-1125), par. 263-265, 274
- [13] "The Ever-Present Water From The Rock" (61-0723M), par. 67-68
- [14] "Future Home" (64-0802), par. 87-92, 95-98
- [15] "The Second Seal" (63-0319), Seal's Book pg. 226
- [16] "Enticing Spirits" (55-0724), par. 147
- [17] "What Is The Holy Ghost" (59-1216), par. 17

Gipadayag nga Pulong niini nga takna, gihugpong ni: Gerd Rodewald, Friedenstr, 69, D-75328 Schömburg, Germany. www.biblebelievers.de, Fax: (+49)72353306

Gihubad gikan sa English ngadto sa Cebuano ni Brother Sammy Durano, 319-A, Purok Maunlad, Buayan, General Santos City. Cp # 0919-898-5252, 0926-036-3663

Adunay moabut nga magadala sa Mensahe nga gikan gayud sa Biblia, ug sa dinalian nga tahas molibut sa kalibutan. Ang mga binhi mabutang sa mga pamantalaan, basahong mga butang, hangtud ang tanang gipili nang daan nga Binhi sa Dios makadungog Niini. [Si Brother Branham sa iyang "Conduct-Order-Doctrine" pahina 724]